

摘藻堂四庫全書薈要

集部

欽定四庫全書薈要卷一萬六千九百四十六

集部

空同集卷五十五

明 李夢陽 撰

序六

贈郭侯序

郭侯為開封府同知三年人曰郭次公陞矣已而果陞而為汝寧知府人曰郭公將轉而為開封已而果又調而為開封李子曰竊聞之三王不沿禮五伯不襲智是

故政也者因民而為者也故順時者致昌者也信謀者  
審方者也俛志遲迴者後時者也今郭侯為開封也於  
斯三者何由焉且夫順逆者勢也大小者形也彼泰阿  
鑊鄒於人非不利也設倒其柄則玩而不畏故曰徑尺  
之魚不遊於蹄涔橫海之舟不納於江河今論者不察  
乃輒立議曰郭君必以其為同知者為知府又曰必以  
其為汝寧者為開封是何異於膠柱而鼓瑟者哉且知  
府之與同知其得為不得為至易知也夫開封者史所

謂車馬之湊四通八達之衢也於今則有監守之臣有  
臨轄之司有諸王之國其屬城則四十有三其賦訟徭  
役勾幹簿書之擾蓋奚啻十倍於汝寧而又日僕僕跨  
鞍馬奔走逢迎如是而其勢能盡如為汝寧否哉且夫  
寬猛者人之所時有也孔子曰平易近民民必親之然  
而肉刑雖三王之世不廢此又何也故居上不寬孔子  
以為不足觀然攝政七日而即誅其亂大夫卯故曰寬  
於良嚴於猾寬主恤嚴主戒今郭侯將為寬者邪抑嚴

者邪諺有之曰近火先焦開封近火者也百姓號號  
嗷難堪矣蓋其地人衆雜人衆雜則其俗易偷而善造  
偽吏隸胥史之徒又輒相鼓扇益盜奸即蹈死地罔避  
懼彼其乘肥馬戴貂帽著文綺衣者蓋踵相接也大者  
白手置田宅與豪富埒矣此其責在知府邪同知邪余  
故曰知府之與同知其得為不得為至易知也且今人  
誰不謂包拯歐陽修相繼為開封也蓋拯以嚴峻起及  
修代之用寬亦起夫二子者固並所謂有道仁人也乃

其治同功而異義乃又並顯盛傳世由是觀之為政各  
任其性用情能附實則民亦易化故曰其所令反其所  
好而民不從今論者乃顧又謂郭侯必用其二不然且  
妨於政豈不謬哉

### 送陳汝州序

陳子以鈞州同知陞而為汝州知州李子聞之色沾沾  
喜幸曰夫陳子前為郎中矣至彰也然豈料其左而卑  
也今之為汝州即非彰也然闕諸天下不細也夫天下

事勢譬之弩也而其動則猶機也坤之初六曰履霜堅  
冰至夫霜之於堅冰相遠也動乎此而應於彼乃若是  
神何也此不謂至微至微者邪故曰知幾其神乎夫陰  
陽善惡君子小人未嘗無類也故陰陽者形也善惡者  
行也君子小人者朋也形不獨立行不特成朋無逆從  
是以泰之初九曰拔茅茹以其彙征吉而於否之初亦  
云故曰同明相照同類相求雲從龍風從虎聖人作而  
萬物覩故朱博雖賢必俟其友乃結綬貢禹即非不肖

然不能不因人而彈冠由是而觀方今無朱貢之徒則  
已誠有朱貢之徒聞陳子興有不彈冠相慶者邪孔子  
曰富與貴是人之所欲也且今人孰不欲富貴假令陳  
子巧詐善宦卑卑與世浮沈或富厚多金玉貨財無論  
一知州即令立致卿相大夫余何所喜幸焉陳子人品  
道德誠足為天下喜幸即令隱約終身予願為之執鞭  
不辭矧今為知州矧將彰而為卿相大夫記曰力田不  
如逢年善仕不如遇合今陳子亦謂之遇合者哉非邪



鈞州知州李君將有禮於陳子念獨余與陳子故同郎中也為友而又故知陳子於是倅來謁余以文曰邦彥不幸不獲交於下執事然知天下有先生久矣敢為吾汝州請然余聞李君亦令名豪傑人也因并告曰陳子行君亦可以彈冠俟矣

李君陞按察司僉事兵屯潁上序

兵刑天下之忌器也然聖王能使人不犯刑而不能使天下無兵能使兵設而不用而不能使兵一日而無食

能使兵足于食而不能不分之以官何則專其事則有緒而易理責衆則勞倍而鮮功昔周成康之世刑措四十餘年不用可謂極治然猶羽旄章于禮器干戚存乎樂舞兵車藏于比閭故曰聖王能使人不犯刑而不能使天下無兵當是之時四夷賓服干戈朽于武庫然猶歲終計盈縮九年論耕畜故曰能使兵設而不用而不能使一日而無食及其立官則司寇司刑司馬司兵司徒司食故曰能使兵足于食而不能不分之以官今按

察提刑官也益之以軍馬城池則司馬事也又埤之以屯田則司徒事也是故其境內刑有弗允以問司寇司寇乃下而問按察兵有弗修以問司馬司馬乃亦下而問按察食有弗給以問司徒司徒乃亦下而問按察按察所主之境地誠狹也兵少也屯寡也猶之可也今李君主潁上之境其地跨江淮邊四省而犬牙民健訟而善潛非必巨獄以隔別雖小亦頻年無了期李君信善刑然能使之咸允乎蓋所轄衛兵率萬計其官率各奴

戮魚肉之又素跋扈稍繩則亢大繩則訐更大則計脫之君即善兵能必其無不修乎又屯田疲弱不盡墾豪強占膏腴租入或于私門逋欠積而牽連李君即善調食然又能必其無不給乎余故曰責衆則勞倍而鮮功雖然得其本萬事理李君固明恕剛慎人也識高而變通夫明恕剛慎者政之本也識高變通者才之緒也以此治事尚有不允不修不給者乎且君故為司寇屬至著也又出而知陳州矣此所謂賢練之吏也如此而尚

有不允不修不給者吾弗信之矣今天子夬夬明斷方  
祛故布新他日或問江淮間刑於司寇司寇誠對曰允  
矣問兵司馬誠對曰修矣問食司徒誠對曰給矣又咸  
曰此兼衆責而能功者也則君不謂之得其本者而誰  
邪三卿者佐今天子用之天下者誠皆有本者也則刑  
不可使之犯兵可設而不用食可無不足也此所謂聖  
王之治也

送梁處州序

同年者擢同年同部者序而送焉義起也蓋惟我癸丑  
之在吾部者為然癸丑之在吾部者前後三十四人十  
二年間擢者二人又皆治郡亦寡矣前劉岳州往王叔  
武首序之茲應樞往處州僉謂予當序夫序叔武備矣  
予何能復言然竊見自內補郡者恒怏怏不自滿非謂  
郡劇且勞而其勢有不獲盡專者邪夫以金緋坐堂上  
州縣吏承風走役悅則利怒則威一郡之休戚雨暘寒  
暑山川鬼神之食惟守主也而按訊有推官收逋有通

判兵戎有同知亮工分職各具成案而決于守守可則  
喜否則懼如是而謂劇且勞而不獲盡專焉者何邪守  
誠曰是侵吾掌刑吾刑賦吾賦兵戎吾覈僕僕案牘間  
日不暇給疑判疑同而不之信而是三人者皆將斂避  
退縮雖有能靡所自效於是事有所不舉矣監者入其  
境則曰守誤之守誤之挫辱抑厄以劒其鋒州縣之吏  
觀望狎玩不復有所警飭亦宜矣如是而欲專欲不劇  
且勞可得邪夫三者達之天下者也應樞是行將自刑

自賦而自覈之歟抑付之前所謂三人者而可否之也  
應樞入吾部歷試八載聲稱滿人口性坦達無較是故  
天下之器於一處州何有處州在萬山中民質直簡訟  
蠶歲三四熟其租易辦卒伍句擾亦亞于他郡前三人  
者且各易為力而賢如應樞與之決可否而行之其郡  
不大治雨暘寒暑不時山川鬼神不享不佑有是理邪  
然此特予所竊見者爾不敢不為應樞告他則叔武備  
矣



送李德安序

李子同年進士曰李宗乾者以戶部郎中擢德安知府  
故事同部擢同部同進士者為言贈焉於是李子謂宗  
乾曰德安非古名郡歟是在雲夢之間矣其地高山廣  
藪利耕織樵牧水者捕魚蝦宅舟楫然其俗輕悍而健  
訟君子則多機術把制人是楚之遺也子往何以為政  
宗乾曰其信乎立于信措于敏昭于斷與厥休息如何  
李子曰善哉備矣宗乾曰何以益我曰無已則寬乎綜

密以輔之乎且兩漢循吏子以為孰優宗乾曰無踰黃

霸曰霸無赫赫之譽若趙廣漢輩所為而天子賜車蓋  
黃金下詔褒譽人到于今稱之弗替非用是道歟當是  
時昭帝立幼大將軍光秉政遵武帝法度以刑罰痛繩  
羣下由是俗吏尚嚴酷以為能而霸獨用寬和為名是  
豈無見者歟夫守近民者也日理民為事顧率務體格  
靡所司察觀霸所為亦可以少省矣霸治民雞豚穀馬  
米鹽煩碎之務罔不精力某所大木某亭猪子尚應口

道之況其他者歟今之守能若是乎宗乾於是起謝曰  
吾性剛不奈事事微子之言吾幾不政矣李子曰夫剛  
乾之質也陽之用也是故綜非剛則隳寬非剛則弛明  
非剛則苛敏非剛則息信非剛則變夫剛美德也吾子  
何患焉宗乾喜誦曰生我者父母知我者鮑子乃再拜  
登車而別

送喬太常序

元年春天子肇祀天地既合羣神于南郊乃復遣使祠

天下名山大川暨古帝王宗室王墓告始也書曰望于山川徧于羣神是也自山以西其鎮曰霍瀆曰河海曰西海帝曰媧曰湯宗室王曰晉曰代曰藩則吾友太常少卿喬君往侍祠建節行蓋道井陘沂太行南並蒲坂反于太原北抵鴈門雲中歷數月乃還往反蓋數十千里按祀典王祀四望天子始踐位祀之巡守至其方則又祀之故公羊曰天子有方望之事至漢宣帝令使者持節侍祠於是近臣始攝天子祀事而輿帛載御祝與

百神抗禮矣祀之義有三一曰尊神二曰尚賢三曰展親夫晉代潘所謂文之昭也媯湯古之神聖人也河海霍望也於是時將天子精意能靡所弗享非太常所有事邪太常掌百神之祀素行無醜於神明又晉之山川所生也夫三者備矣非太常享而孰享邪是故孔子曰我祭則受福言有本也山西連年凶赤野千里黍稷不植牲牢簞簋百神之典將有所不給今天子踐始遣俊臣往修禋事如是而復雨暘愆期甘澤弗降神曰失職

賢曰助慝親曰悖德夫山川鬼神豈若是極乎子行矣  
予於是望之矣

送何職方序

今之所謂賤丈夫者非薪若瀟字至其道山澤之事雖  
善方輿家言莫能詰其所從來此無他踐之實者言之  
切身親歷之與得諸口耳者異也夫言於人亦難矣兵  
也者難之尤者也山川草木之利疆異而界不同車騎  
步短兵長戟劍楯矛鋌弓弩之施又相率百不齊故曰

大小異形強弱異執險易異備彼坐高幄擁僚佐談萬里外事設非身踐其地信才且知而克一一中哉趙克國漢名將也及討西羌則曰百聞不如一見願馳至金城圖上方畧然則兵果易言邪新天子即位銳意戎政乃敕司馬卿屬數馬于邊鎮而榆寧肅三鎮則以郴陽何君往君少年負駿才至于兵戎之事又為長茲奉璽書踐萬里之域異疆殊界將靡所弗陟竊於君有賀矣君前在職方圖天下地形寢壁上號曰卧遊予間叩之

曰吾得其形焉踰年又叩之曰得其勢焉再踰年曰得其備焉然終不以是自是而予亦不以是是君者以未踐也天下之患莫大於西北邊西北邊莫大於榆寧肅三鎮者君踐有日矣歸坐高幄擁僚佐談萬里外事尚有能詰之者否邪予于君之離是故以之賀而不以悲君幸勿諉曰吾之行數馬焉耳矣

### 送程南昌序

正德元年秋九月戶部郎中程君拜南昌知府之命是



日朝士夫咸歎息為君惜謂君守南昌弗宜其言曰南昌省下郡俗機狡健訟君非法家者流性簡靜鮮事事又恒疾信若是南昌不置守乎夫天下性同也南昌之人獨不守同乎守之於民以分則帥也義則師也親之則父若母也父母師帥不可以機狡逆其子弟子卒徒而為之守者以之逆其民欲民之不機且狡得乎假令程君斥簡以徇擾擯靜以徇暴治其民而民從之且猶不可而況未必能治治之未必從乎且天下之事不能

皆試而為今舉其大若要者錢穀甲兵訟獄三者而已  
必欲其皆試而為必從事於衡石矛鋌桎梏之細而後  
稱司農司馬司寇之位設終身不為司農司馬司寇而  
前三事者將終身不之諳乎程君固未始試司農者及  
仕為司農屬即赫赫以能著稱今往理郡訟有不著稱  
者乎父母之於衆子有訟未嘗不斷斷之必當者其視  
均也有不是未嘗不撻撻之不怨者其愛等也非均且  
愛必不能服其子之心惟師與帥也亦然君苟以施之

子者施之南昌之民南昌之民必治治則不爭不爭則  
化化則其功易叙當是時義冠坐堂上百胥羣姓奔走  
承奉于下豈必強力者而後能邪故曰操簡以御衆居  
靜以制動此天下之政也予於君官同部又同進士不  
宜無言以別會曹長胡君伯雍合羣寮友以文見屬遂  
發其所欲言者如此

送馬布雲歸序

馬君布雲主事戶部四年矣一旦致其事而去同僚既

釀為之餞而又屬予之言予幸接下寮日以簿書期會  
為事其何言之能為雖然竊有聞焉君臣之義道不合  
去言不聽去不得其官去年及去疾去以予觀布雲年  
未及也非疾者也布雲前為中書舍人九載克厥職乃  
擢主部事布雲又克部事鄉督太倉粟吏不敢蹈奸於  
是舉督天津粟天津之人咸藉藉稱明斯非不得其官  
者也非所謂言迂而道違者也而何以遽去無可去而  
去予於是知布雲之賢也夫自士大夫以官為家進退

之義擯而不講於是有老死于位而不悟者穢行詭迹之士遂宴然行列蒙詬詈不顧甚有卧病牀褥猶日探除拜問調遷者使其弗事事則已苟或事事而能以不得不聽不合去否也嗟乎予於是知布雲之賢也使布雲不得其官去言不聽去道不合去老去疾去猶為賢矧無可去而遽去邪夫宦譬之海也百險備焉逆之則危犯之則溺不知而不去謂之逆知可去而不去謂之犯布雲茲去譬若泝恬波而行興意窮極舍舟登陸其

有不樂者邪布雲偉軀幹美髭鬚豪爽尚義少失意於  
科第老復弗究其官必考壽樂其餘年必生賢子孫昌  
大其家不然何以與危者溺者別也

兵部尚書華容劉公歸序

公自去歲上書乞骸骨上察其忠誠勉留之至是三上  
書不許會公目疾引請益力上不得已許焉賜璽書文  
錙有衣一襲行之日冠蓋車騎填塞路衢道旁觀者咸  
歎息爭走覲公聚而轉相語豈不為至榮幸事邪議者


謂公前以司農卿歸先皇帝特詔起之置之左右委以腹心數召對訪延失得故每語屏從侍必移刻乃罷所謂帷幄舊臣者今天子幼冲玃玃在疚四境未輯忠鯁耆舊之臣不可一日去左右又大司馬者佐王平邦國者也公去誰與理邪公不聽比去議者以聞天子廉公有決志故卒不留公夫士有必去之志而後有不可奪之節故古之人有招之不可來而臨事麾之有不可去者豈不為俊偉烈丈夫邪為公者誠曰吾可去去焉卿

又曰吾可去去焉大夫又曰吾可去去焉朝去一公暮  
去一卿又去一大夫君人者必謂榮貴利達不足以盡  
天下之才天下之才亦必自以利其榮貴利達為辱若  
是即使公決于去何不可邪知天下之才以利其榮貴  
利達為辱將遂以是風天下故卒不留公若是天下之  
願仕於朝者且駢駢至也先王之訓人也語交際必曰  
義進退具焉先之以幾顯微生焉決之以時消長形焉  
故亡義者貪昧幾者危悖時者殘三者有一焉上之人



必賤之曰是求榮貴利達者夫惟賤之也故天下之願仕者不至故曰即使公決于去何不可邪公前為司農卿諸生以郎吏事公洎為大司馬公以舊郎吏又數數見愚無似誠不能狀公然竊知古之所謂大臣者有是義也易曰不俟終日殆公之謂矣既相率祖公于都門北地李某乃為之序

空同集卷五十五



總校官庶吉士臣侍朝

校對官編修臣閔惇大

謄錄監生臣任益春

欽定四庫全書薈要

集部

空同集卷五十八

六至

詳校官候補通騎經歷臣郭祚熾



欽定四庫全書薈要卷一萬六千九百四十七

部

空同集卷五十六

明 李夢陽 撰

序七

贈豫齋子序

豫齋子者歛鮑氏輔之號也鮑氏三歲而喪母十六而  
商中年出分五十而行成家就君子謂其行有合於豫  
於是字之曰以立言凡事豫則立也又號之為豫齋子

言其立本諸豫也或問李子豫有說乎以加鮑子李子  
曰豫有四義先事而備者貴其幾居順而防者戒乎逸  
既成而受者羨乎享隨寓而遷者用乎時在易之豫重  
門擊柝以待暴客蓋言幾也先事而備者也然在初則  
鳴于三則盱于五則疾于上則冥何也斯所謂戒也故  
不幾不知不知不戒不戒不享享者何也二之貞吉四  
之盡簪是也然必由于戒何也時與位殊也夫天下未  
有不生於憂患者也鮑之為人也未形而識微垂成而

慮患大諦而小詳情深而意遠乃其商也察低昂酌常  
變齊盈縮審棄取故其利恒數倍而鮑之分也二百金  
耳十年乃有金二十百然皆分內無刻削損心之行斯  
何也先事而備者事無不濟者也斯豫之幾也然它商  
利則率侈華盛以明得意鳴箏竿挾妖艷策肥茹甘乃  
鮑子則顧益務實守約不鳴不盱不疾不冥語人曰官  
怠於宦成病加于小愈家毀於縱財耗于奢故其日費  
有經歲計有紀久於外不近婦人亦以表範於朋儕斯

所謂居順而防逸而能戒者也故其貨積身安子孫成立年近五十言行重于鄉評斯不亦享矣乎是故君子與焉稱豫齋子豫齋子云乃鮑子則又仁藏而義顯往往濟急而扶危以為自事李子曰予觀鮑子之行而知豫之道該也何動非順何動非時順而復時乃何行不成矣歟君子曰鮑之父殯也久矣而輔也匍匐山林竟獲地葬焉斯亦順動之一歟李子曰天之所助者順人之所助者信鮑子其得天者歟然由諸豫也是故稱豫

齋子

贈蔡濟之序

蔡生鏊中武第歸李子喜造焉已而歎曰析薪有理導  
民有以蔡氏之謂哉予於是知國之有紀也昔者先王  
之導民也不欲其獨文也是故生而縣弧長而佩劍隙  
而蒐狩敵而戈矛然又不欲其獨武也於是迪之詩書  
習之俎豆軍有軍禮射有射爵是故其禱君也曰允文  
允武臣也曰文武吉甫言不貴獨也後世典用既殊猛



悞各途逢掖寡斷介冑愚粗位乏兼材迄於有今制定  
科興策收射微遂使彎弓兜鍪之夫有揖讓折衝之能  
是故據要擁壘縣綏內和戎匪官之曠有紀之證也然蔡  
氏膺之厥子是繼詩曰教誨爾子式穀似之蔡之謂哉  
左史王公曰螯之鼻祖挺自行伍連帥有聞施及厥父  
四世矣螯之祖往訓之家曰慎爾戎事無忘厥父螯之  
父又謂螯曰小子勗哉爾祖有訓是故螯之父兄弟並  
興文武各第立幟揭幟雙壁是輝螯今繼之厥後足占

矣李子曰被風者偃得源者永國之導風故其行速家  
之導源故其獲深微王子予詎知蔡之能家也封丘黃  
子曰李子善言國紀王子善言家訓雖然遺厥本矣匪  
德弗承匪德弗啟西疇公儒雅弘裕秉直而布誠忠上  
而信下具茲五德矣是兼材也有子如鑿宜哉

贈王生序

夫華池西鄙之砦山也其俗牧樵衣裘氊不識文字其  
地苦寒其人民零散而艱難然其地顧產王生王生者

則詩書衣冠徒也余之寓華池也在弘治丙辰丁巳年其時王生始遇余而從之學夫王生起家非衣冠故族也無詩書之世業也窮僻寡陋鮮同聲之胄也一旦棄牧筆豎褐挾冊書從予學是謂耀至寶於污穢之鄉秀芝蘭於叢棘之中卒奪巍科致身顯名豈不謂異常之士哉後十餘年而當正德己巳王生自京師還而過大梁見余然猶為青袍生塗路坎坷於是告王生曰竊聞之富貴在天行藏有命久速有時古之人不有起自寄

食牧豕而身為將相者乎豈其始才知弗人若哉亦時有遇不遇耳故曰雖有至寶自售則輕芝蘭逢春香乃發生故不務修己而求富貴者謂之違天藏而求行者謂之逆命久而求速者謂之悖時斯三者君子不由也子之歸亦修己以俟其自至者矣耳王生曰夫孤立鮮就獨行無成余處窮僻寡陋懼不修也乃今聞教矣

贈余思睿序

夫舉其身而豫能自知焉者寡矣故壽夭吾不得豫知其

壽夭疾病吾不得豫知其疾病禍福吾不得豫知其禍  
福子孫吾不得豫知其賢不肖故欲吾壽戒凡戕吾生  
者已矣欲少疾病不為諸致疾病者已矣欲寡禍我不  
為禍端已矣欲子孫賢教子不為不賢已矣我教之不為不  
賢乃仍為不賢也此下愚不移者也古之人有焉丹朱商  
均是也我不為禍端而或禍我也此无妄之災也若孔子  
厄宋黜曾子避越寇是也不為諸致疾病者而疾病也此  
謂之命也冉伯牛是也不為凡所戕生者而弗壽也此之

謂天也顏回是也夫六人者皆大聖而大賢而其遭乃顧  
咸若是夫余思睿欽之田野氓耳未必有聖賢之行也今  
其三子皆克家是不為不賢也夫婦各八十餘歲是壽者  
也然又康強是少疾病也生無災危是鮮禍也則何也李  
子曰夫天道好生而福良人道積善而有慶故人不必皆  
回能弗戕其生雖有不壽焉者寡矣不必皆伯牛能弗為  
諸致疾病者雖有疾病者寡矣不必皆孔曾能自不為禍  
端雖有禍焉者寡矣不必皆堯舜能教其子孫不為不賢

雖有不賢者寡矣故曰大小之應捷於影響今思睿兄死  
無後不利其財事其母以孝聞非自求福者乎寡慾慎躬  
非不戕生者乎且又何疾病矣躬行率其子孫非教之不  
為不賢者乎故曰人有必壽必壽而不壽乃始曰天有必  
不疾病必不疾病而疾病乃始曰命亦有必福必福而不  
福乃始曰无妄之災教之有必賢必賢而不賢乃始曰下  
愚不移故曰影響之道大小以之處常則雖微必應遇變  
則聖賢不遭嗚呼善觀思睿者其知天人之際乎

贈汪時嵩序

鮑輔氏告我曰歟有淳行人汪時嵩者於輔外舅也而今六十矣輔聞之六十始壽夫壽未有不文以彰也而彰也必賴於名文敢請予曰未同何言為夫不知其人而頌之者佞也敢辭鮑曰時嵩可以文者五焉予曰五者何也鮑曰汪鉅閥也系出越國公華而時嵩祖號碧山翁者以文行稱嘗樹桂堂前桂至今存也以是厥里名叢桂云斯亦足以呼喬木家矣夫汪閥鉅而繁人而



時嵩長於其行至百三十人餘焉長而義鮮不悅也夫勤儉和審四者士之優也而時嵩有焉是故以商則順以耕則獲且今喜談而樂道者非謂久而同居者罕聞哉而汪氏同門出入內無間於人言今十有一世矣予曰嗟予聞諸君子禮以義起文由譬闡行以類求故人情莫不有親親之莫不愛焉愛之必祈之曰百壽不已必曰千壽又不已曰萬壽壽之而假文焉行茲非先王之程也然厥義存焉甥舅者婚姻之經也推內之愛以

愛其所生而文以壽之禮也故曰禮以義起鮑君足當之矣夫文者託物以宣者也故古之壽有曰日者月者山者川者岡者陵者松而栢者凡以達愛焉已矣適有叢桂於是作叢桂之歌歌曰有樹偃蹇兮堂戶君有瑟兮胡不日歌以舞金昆兮蘭孫沓以進兮朝飮麓兮暮擊鼓斯亦取譬闡文達愛之義焉已而聞之者乃曰李奚篤於時高夫子賤取斯于魯賢尹公擇友於學射王謝門閥朱陳世姻非其類者固鮮有聚者也鮑之父時

明者誠孝而著行君子稱焉而輔也靡較兄貨孤立而潤屋推計其姻門時嵩壽譽五者足徵已故曰行以類求者此也鮑又曰厥父永實生二子長則時嵩時嵩配程氏孝敬善握家有三子二女孫三人云

送史泰序

驛有舟有馬兼水陸者兼舟馬其最著自京師陸行南皆大驛大驛有南馬其丞與州縣長吏埒富次則自京師水行不然逮陸驛甚陸驛非閤大臣及權力所役使

不得除即除不購不得以為常人亦不之怪也史泰以  
陝西承差至京師不得為閣大臣及權力者使及除貧  
又不得購於是除平望驛丞平望據水僻較之自京師  
水行不逮又甚臨行意忽忽不樂予謂之曰子聞周官  
乎周官雖卑末如遽傳牧廐各慎厥職惟厥賢故天下  
大治昔者單襄公假道于陳以聘于楚謂其候不在疆  
國無寄寓縣無施舍占其國有大咎曹之候人何戈與  
祓能稱厥職詩人歌之今之驛即古遽傳寄寓施舍丞

即古之候也且若等向非齊民邪以承奉奔走之力天子錄之俾列在末官豈謂思與州縣長吏埒富邪何為忽忽至此史泰曰今號明經居尊官職宣助教化乃日務富厚蓄金帛為子孫計夫驛至卑也丞至末也奔走承奉之職易稱子何望之過哉予謂之曰人之美劣不係官之崇庳古之人歌之咎之獨非此等官邪假令若等不慎且賢即已誠慎且賢孰謂無助于治哉法驛丞得捕邏境內錄其績夫平望盜藪也輕舫利刃出沒雲

濤烟浪間至橫也子西北人也壯膂力精騎射即其所  
事豈直奔走承奉間邪史泰曰然微子無所聞教史仲  
成者永樂間都御史也有風裁慶陽安化人泰其孫也  
泰於予有瓜葛故於其行為之言

### 送嚴世臣序

教人者固教於人者也其始教於人也見彼嗜酒喜賓  
客怠厥事諸生以所業請輒置諸案上不理數日再請  
曰姑徐徐再請乃不得已朗誦一過指示之曰某善某

疵其不愜吾意更為之更為以請亦復若是因循歲月計餽遺腆薄為憎喜有他故輒取憎者而撻之諸生信謹厚有不退而心非者乎夫吾既退而心非之矣他日以所教於人者教人可乎蓋教官卑而祿薄俯仰不贍鮮有弗蹈于是矧鬱鬱哀邁之士竊升斗以苟朝夕彼始雖心非其人而終不自持者豈少哉嚴君世臣少好學負大志累試有司弗偶年踰四十始取賓貢拜大名府教官以歸君曩在諸生列端方雅飭見禮於其師師

有弗義輒從而爭之人謂君他日必為良師茲行也其  
不以教於人者教人必矣其終能自持也較然矣予既  
重君之為人又喜大名得良師作送行序

贈王弘化序

弘化湖西人侍其父地官大夫北學于京師去歲則從  
其外舅康大夫館于汴館禮既成將復學于京師暇日  
因谷生者來顧余曰願以言請余席未暖且北行況未  
同而難言辭謝不敢受弘化五顧余而意益堅以書諷



谷生者至再至四夫弘化之好予言亦至矣弘化少歲有俊才出而壯觀往來燕趙梁宋間車馬僕從光耀氣焰意者恐人不肯言而乃屬予言之歟夫當是時誰不願因言託交于弘化因弘化託交于其父其舅弘化第未始有請耳庸有請而不言者乎顧獨懇懇于未同而難言者予固謂弘化將求益於是行也弘化陶成父舅師友之賢覽都會文物之盛所以修于身見于世者宜無不備而復求益焉何歟余不幸學古未成反戾于今

質劣以阻合踈散以招謗方恐懼退畏以求自新雖有一得弘化能相信不歟予故因谷生致意曰願弘化行其所學求合于古而不必拘拘於今是行也請于其舅其父再請于其師以予言為何如也

### 送左載道序

君子之仕也非為人也人之望於君子非欲已悅也然舍是二者則難乎免於今之世令卑而近民者也卑則易凌近民則難稱易生忽難生畏夫苟忽之矣雖無心

於已悅而稍不如意則怒苟畏之矣雖無心於為人而稍不如人意則沮斯二者勢也及其弊入境觀逆入邑觀趨去則觀所將苟無一失于是稱之曰良令良令匪徒稱之又從而薦之為之令者惴惴焉亦惟恐失諸是以為之辱故凡可以悅人者無不為矣如是而謂令不古若尚安咎哉昔子路治蒲三年孔子入其境曰善哉恭敬以信矣入其邑曰忠信以寬矣至其庭曰明察以斷矣吾儕誦法孔子者所望諸人與所自為乃若此無

惑乎令之不古若也左君載道舉進士拜永年令人亦不之悅銓司聞之曰不為人者必能為其民盍再試焉於是改太康令三年邑果大治上其績於銓司銓司喜曰吾聞若令一而民聽所謂敬以信者邪又聞若務大體靡所苛察然自其治邑境內無冤訟所謂寬以斷者邪設有未至亦吾夫子之徒也大嘉異考上上嗚呼世有特立之行苟無深知而能免焉者寡矣君子而好古者觀於載道亦可以自慶也夫

章園餞會詩引

章園之會賓一人升之主三人元瑞庭實其一子也園主一人千戶倫是也亭設四几上三下一升之居中予以齒居左皆專几元瑞庭實則共几而坐元瑞居庭實左下坐而北向者園主也時升之報政將歸贈留之言皆不可少予誦杜甫千章夏木清之句為五闌令侍子拈送焉予即得十字右旋而成句人大賞異蓋數之適然如此升之既得闌義難輒避乃以次書之云曩予

會升之河西關有傾蓋之雅是時升之書學歐陽詢詩  
吾不知其誰學知其為唐也今其書若詩吾不知其誰  
學知其為六朝也說者謂文氣與世運相盛衰六朝偏  
安故其文藻以弱又謂六書之法至晉遂亡而李杜二  
子往往推重鮑謝用其全句甚多梁武帝謂逸少書如  
龍躍虎卧歷代寶之永以為訓此又何說也今百年化  
成人士咸於六朝之文是習是尚其在南都為尤咸予  
所知者顧華玉升之元瑞皆是也南都本六朝地習而

尚之固宜庭實齊人也亦不免何也大抵六朝之調悽  
宛故其弊靡其字俊逸故其弊媚詩云樂彼之園爰有  
樹檀其下維擇擇而取之存諸人者也夫汴流而上不  
能不犯險者勢使然也茲欲游藝於騷雅籀頡之間其  
不能越是以往明矣予好文而未能竊以所嘗自規者  
為升之告試質諸華玉以為何如

空同集卷五十六

欽定四庫全書薈要卷一萬六千九百四十八

集部

空同集卷五十七

明 李夢陽 撰

序八

壽兄序

正德庚辰之歲李有長公者年六十矣十二月十日其生辰也傳曰六十始壽於是都指揮同知霖僉事臣左長史春右長史崑訓導澤通判環司務彬儀賓正八人



者為長公者壽登厥堂致詞而稱觴焉蔡子曰德基業  
昌而色而康申錫無疆鞏子曰智圓義方肯構肯堂於  
祖有光王子曰夫鴻婦光偕老孔臧子孫行行郭子曰  
子如鷺翔孫如玉蹌儼雅柔良趙子曰魏榭曲房純衣  
穀裳無青無殃李子曰甫田穰穰有積有倉有牛有羊  
黃子曰和親睦鄉族衍宗強縣徙苞桑全子曰禴祠蒸  
嘗以孝以享成儀矜莊於是長公者前徧觴客謝而其  
弟曰夢陽者亦前徧觴客謝申詞焉曰竊聞之好謙惡

盈者天之道也既滿知懼者人之要也故視履考祥者  
終始之蹈也生而全歸者子輿之孝也是故君子聚之  
而必散以廣仁也負貸無必取以拓義也內交不狎外  
交不淫以存禮也豫患而前危憂深而慮遠以踐智也  
吾門一事之嘉也凡必涕泣而曰斯匪和之能實台祖  
與父之積即一弗之嘉凡曰斯匪伊之咎實和之弗德  
人或弗循也凡必訓之訓之而猶弗循也曰和弗忍弗  
之訓也人有急兄赴之赴之而弗及曰和弗忍弗之赴

也故懦者懷其惠強者畏其義踈者慕其禮淺者服其智此所以既富而人不收布衣而有官位之尊垂老而橫逆靡加諸身也斯長公之行也

姜翁夫婦八十壽序

人有言曰富壽康寧然論者必歸諸三王之世非謂其太和風熙無愁苦夭折之民耶雖然八十者於其時亦罕矣故其制曰八十拜君命一坐再至又曰八十曰耄此非謂其筋力志慮衰耶是故有罪不刑食則常珍于

朝則杖夫使八十者誠易得也古之人豈宜優禮若此哉然此亦謂其耄者耳非夫婦偕也假如八十而夫婦偕又弗耄也若今長安姜翁者古之人又若何而優禮焉嗚呼亦罕矣余讀載記上下數千年間夫婦齊德而隱者吾獲三人焉冀缺梁鴻龐公是已然三人者史皆不著其年設其年與姜翁比然未必皆弗耄也即弗耄矣未必與其婦偕也嗚呼若姜翁者不誠罕耶不誠罕耶且壽者氣昌而娛樂者之為也今天下民窮而歛急

輸不息肩徵弗停催亦甚矣姜翁顧奚所娛于心而使  
其氣昌也余竊嘗觀翁夫婦矣並生于宣德初年是太  
和風熙之際也一宜壽齊德而隱二宜壽所謂栽者培  
之也其子判名郡振勵不辱其身養志率訓珍綺備矣  
三宜壽夫三者一係之天二係之人是氣之機而娛之  
要也故曰得機者昌知要者康夫若是乃其壽焉得而  
不偕也又安所得耄矣余往年道秦晉之境見山谷田  
野間多龐眉皓髮之民乃其年故不亞姜翁然徵輸比

急愁歎貧病相與轉而之溝壑者殆半矣幸而存矣氣  
昌而娛樂者幾焉於乎亦罕矣予於姜翁夫婦有深慕  
焉有深敬焉又有深感焉作斯序

封監察御史王公壽序

燕人王公就子養於河臺夫婦齊年而耄八月二日公  
生之辰也壽公者冠履闐門而入客目之而歎曰昌哉  
入見公癯而強也見公配李堅而貞和而神清出而曰  
康哉既又見其子憲君之懽其親也則曰養哉以告李

子李子曰昌生之積康根於娛娛由養生養由心作四者始天而終人者也故仁人修身以成其天孝子法天以永其親夫金石負質松柏耀材麟鳳彰德質之言氣也材之言植也彰之言時也故小大形之者氣之庸也完體俟用者植之功也務實生名者時之通也故耀非其時則有必養而無必昌植非其成則有必積而無必娛結非其氣則有必娛而無必永故壽者始天而終人者也客曰吁俞哉王公孝敬勤家聚而能分年彌罔渝

厥配相之貞淑明惠德流嗣人非積者歟憲君慎官約  
身若志養體居處順適耳目以和非由諸心者歟非心  
奚娛非積奚昌昌以其時娛以其植氣之永也斯其徵  
矣竊聞之引而無絕之謂永湛而樂之之謂娛安平縣  
吉之謂昌王公自茲期頤為錢鏐為大椿有乎李子曰  
有哉孔子之言仁也曰仁者樂山詩之言孝也曰孝子  
不匱永錫爾類夫山也又永爾類矣壽尚有既乎雖然  
降爾遐福者天之命也脩身俟之者人之正也故仁人



事天孝子愛日言盡乎已焉爾公前以子封監察御史而厥配李封孺人厥孫男子七人吁備矣

南園翁九十壽序

南園翁者京兆人也今年九十矣耳聰目明體履矯健喜飲酒然多而不亂與人奕竟日人以是疑翁而私相謂曰夫酒血虛則罔勝中熱者必病夫奕心機也即壯者奕鮮竟日也於是私相論翁一人曰翁之壽自為之也一曰養之備一曰主於積一曰生有之爾言自為之

者曰夫膏煎則涸燭風則淚故氣耗則損精搖則竭形  
勞則憊神役則折言養之備者曰翁之子嘗巨邑矣復  
有二孫接步於巍科夫外足者內娛心歎者體顛耳目  
既和懼洽隨之矣故志廣者適氣舒者永旨甘日陳諸  
前紛擾弗嬰於中即弗壽期壽斯臻歟主於積者則曰  
竊聞之積水成澤積善成福翁教行於家化及鄉閭義  
形於斷仁闡諸施四者昌之道也烏乎不壽言生有之  
者則曰均介龜壽均羽鶴壽化工非私於松竹其於寒

也獨榮斯無他定之秉者人莫之增也若歸諸為則顏  
回豈天札之行咎諸養則榮啟期九十帶索被裘行歌  
斯亦窘矣主於積乃跖則以壽終故金石負堅錢鏗引  
年所謂死生有命富貴在天者也二孫之過大梁也以  
其言告李木李木曰言生者拘諸氣者也積者修諸志  
者也養者兼乎外者也為者專乎內者也吾請諸叔父  
其叔父曰上古之民蚩蚩故其民上壽上壽百二十歲  
中古之民皞皞故其民中壽中壽耄耄季世之民勞故

其壽耆而老者寡矣蚩蚩之民不知不識順帝之則者也於是擊壤而歌曰帝力何有於我帝之世也皞皞之民民之質矣日用飲食者也於是鼓腹而游出作而入休王之世也嗟爾木汝以是足以占翁矣汝見翁乎蚩蚩者乎皞皞者乎

汪子年六十鮑鄭二生繪圖壽之序

汪子者歙人也而商于汴嘉靖元年生年六十矣九月九日其生辰也於是其邑人同商者鮑氏鄭氏繪圖壽

焉一鶴立巉岨之上張兩翼宛頸下鳴警日也日躍海而升厥焰赫霞龍赤上則青松茈焉下則白濤沸焉雲氣旁流清飈淠焉懸蘿翳焉乃有紫草之英瓊芋之蕤媚礪砢而妍嶮崎於是李子聞之曰壽哉汪子圖獲之矣夫鶴昂藏弗羣者也非芳潔不啄非清冷不飲志在霄漢一舉千里斯天下之禽也然又千齡而丹萬齡而玄上仙之所親幸神明之所賓友造化者之所綏也是故壽者取焉非但長視亦以高潔隱處之倫也夫汪子

者隱之市而處乎商者也出游者四十年無卑行焉乃  
今六十無汚名焉固鶴之倫也二生圖之以為之壽不  
謂之獲哉故曰壽哉汪子昔者詩人之禱君也曰如日  
之升焉如岡如陵焉如松柏之茂焉而斯圖也三者具  
之獲詩之義矣夫君臣朋友殊分而同情者也故愛之  
咸欲其久久莫如岡陵次莫如松柏其大者如始日圖  
而禱之愛不啻鶴矣圖之情猶詩之情也故曰獲詩之  
義義發于愛仁之緒也仁不徒加義不苟受孟子曰愛

人者人恒愛之是也夫汪子者其仁人也矣汪名昂字懋昂號松崖子鮑名弼字以忠號梅山子鄭名作字宜述號方山子

陳公六十壽序

陳公者鄆人也年六十矣神意和朗步健髮黟李子聞之曰異哉陳子斯謂自壽歟黃子曰何也李子曰古之壽以上後之壽以已曰壽天筭也有人已乎李子曰吁有哉古者教民胎有訓生有將幼有習長有產其哀也

則優之以禮崇之以逸於是有尊齒之經國養之文有杖鄉朝之制有給肉帛之令有就見之體珍從之儀是故民至老無疾癘夭札之災生鮮窘憂而終之安然上之人猶懼遺也則又鼓南薰之音吹陰崖之律俾躋之一是故民鮮弗壽也故曰古之壽以上後世畊鑿作息弗時民始自力以求諸全於是以勤集用以儉省費以退消事以靜抑慾以適導性以愛親物以恕容衆求全焉以自延其年而賢者藏也則恬丘壑甘農桑于于煦煦



罔口世務而或未忘也則誨其子孫出俾與時翱翔曰  
猶吾出焉耳如此亦恒安而寡災故曰後之壽以已黃  
子聞之赧然而笑曰有哉夫陳公者七善具者也賢而  
藏夫身為封君彰矣乃猶野服於林石斯人者真所謂  
力全者邪李子曰我明興也準古而酌今厥典備矣是  
故國無不養之老鄉無非齒之民肉帛之詔屢下而問  
卹之令恒申也陳公者亦謂三代之民非邪黃子曰某  
聞之天壽不貳脩身以俟之譬諸黃茂種美而地肥不

有水旱之厄風雨之災乎故力全者人長養者時成之者天故曰壽天筭也陳公兼之真三代之民邪公號其居曰坦窩遂自稱坦窩道人子某以名進士官至山東叅議其壽之辰也為正德己卯八月一日會叅議君歸稱觴於家

黃太夫人八十壽序

黃太夫人者尚書黃公之夫人也初尚書娶于孫生三子楫霖彬封宜人矣無何卒而繼娶于魯生二子杞桓

封淑人矣無何尚書卒桓之官也例進其父母於是魯淑人進太夫人封是時年八十矣諸郎在者彬與桓耳彬工部司務免居大梁桓南京光祿寺署正也奉太夫人於南邸工部之居大梁也立香几於庭日夙興几拜北向拜者四祝萬歲者三南向拜者四祝萬壽者三客問工部南向拜祝者何工部輒泣已揮淚曰吾母就弟桓於南邸已而又曰彬四歲而亡母幸魯夫人育之成彬猶成桓也又曰桓今尚無子彬有今郎也魯夫人

聞之日寄音思見之無異桓子也客問夫人耄而祺者何工部曰母惠而靜儉而敬問四懿者何工部曰得之性而規諸行者也先尚書嘗謂母曰人附於惠神凝於靜家裕於儉德聚於敬是故母遵服之老而無懈節而有儀守一弗撓恕而罔私故既耄而祺天降之禧李子曰予於太夫人之壽而知天人之道也得諸詩三焉三者何也尚書公力德而貞業矩內而標外行于其室四懿是成非刑于寡妻歟二子勇脩克念異胞同心厥肩

晚挺非永錫爾類歟嘉號載臨冠帔進榮非降爾遐福  
維日不足歟客曰予得之易視履考祥其旋元吉工部  
曰予得之書歛時五福用敷錫厥庶民是故予夙興几  
拜北向拜者四南向拜者四

鮑母八十壽序

嘉靖六年十一月二十三日鮑母劉年八十其子曰崇  
相者汴商也先期馳歸謁李子請言焉李子曰予有天  
下之珍四畀汝歸而壽焉可乎崇相默無以應也心忖

曰珍者言邪古之器邪今之寶邪既曰四非言矣徐請  
焉李子曰予之四珍崑崙之桃扶桑之繭丹山之雛翰  
海之鯤也是四者足以壽乎崇相聞之默無以應也良  
久曰竊聞之有其理而無其事君子據理以訓來有其  
事而無其言君子即事以宣往夫殊陬異域有目所未  
睹人迹未之及如崑崙扶桑丹山瀚海之倫固寓託之  
微而荒唐之云也夫鳳之雛有矣如甕之繭天池之鯢  
王母之桃果有之邪今子謂之珍又以此之吾母壽邪崇

相惑焉是以默無以應也李子曰鮑商知道哉夫自世之狙于夸也于是務文而擯實自人之習于偽也于是內畧而外詳是故事其父若母名號冠帔以為榮而辱其身者或弗之慚拜跽奔走以為敬而憂其親者則莫之恤牡醴稷黍以為養而違其志者不之顧也故壽其父若母繪西池之圖撰南山之頌誇東海之壽侈北斗之杓惟怪是述而不復計事與理之有無今汝不予言之珍而訓來宣往者之惑不謂之知道何哉崇相曰僕

世商也自我先公輩有修而弗耀雖無所為榮者然身  
弗敢辱也雖無所為敬者然弗敢貽親之憂也雖無所  
為養者然志弗敢違也是故吾為母壽弗敢述怪以速  
君子之譏而先生之言請焉李子曰夫子非知道者何  
言以塞汝哉雖然嘗聞君子之緒論矣居而養者以志  
壽離而養者以心壽心壽者使親之心常樂離猶不離  
者也志壽者使親之志不違居而安之者也汝商也有  
離焉以心壽可也心壽則樂樂則無憂無憂則無辱其



敬親莫大于是崇相乃于是再拜曰天下之珍四不如天下之珍一是故人有真珍焉心之謂哉有真樂焉壽親之謂哉

柏溪君哀序

柏溪君亡也哀于戚及其踈起之邇動乎遠蓋鮮不愴焉悲也鮮不唧焉吟咨咨而音使人聞之鼻鮮不洩者鮮不泣然而淚也斯哀之至也李子曰哀有誠偽戚疏辨之賢愚之等邇遠見之何則哀者戚之之要情也舍

是惟賢則哀之哀賢雖疏遠可也夫天下未有無從之  
涕也恩離愛析頓踴漣湏如求如失強寬弗解泣至不  
期此天下之必情也何也戚之也小人之於哀也或飾  
詐以成勢則有抱嬰而泣者莽是也或諂往以希利則  
有拜墓而哭者韜是也或破疑以濟謀則有沾衣而別  
者嶠是也斯所謂無從之涕也有為而哀者也故曰哀  
有誠偽戚疏辨之是也夫柏溪君東川之布衣也生無  
可借之勢歿無可希之利假之不足以濟謀其亡也戚

者哀之疎者哀之邇者哀之遠者哀之斯何也天下有  
必賢者也賢之則慕慕之則思思之不見則悲悲之則  
吟吟之則音音之則詩故聞而冀見之者景行者也知  
而重違之者存敬者也過墟里而歛歛者不必戚經祠  
墓而淚流者百世而同臆也如林宗孺子之儔是也斯  
哀賢之至也夫永死於藥而飛於爐者以真之必反也  
鍤亂金者也闇者金之明者鍤之以偽之難掩也故非  
賢而哀非戚而哀皆飾之諂之謀之之類也故曰得戚

者情得踈者義得邇者狹得遠者廣踈戚邇遠之間而  
人之賢否決矣柏溪君有子曰講舉進士過大梁言其  
父之所以哀而蓬溪譚子復語予柏溪君行予文成亦  
為之歔歔久之

余公挽歌詩序

余公為河南按察司副使三月亡何遽卒其友人李子  
哭之見其挽者歌之一歌之百和之乃喟然而嗟也曰  
予觀詩書六藝之文至於論天道備矣其最明著伊尹

曰作善降之百祥夫然後孤行特出之士恒恃此而不  
懼不平也則呼曰天乎天乎故寧隱忍軼軻終不肯降  
志辱已苟與世推移亦冀求伸於將來乃今不然善不  
必壽惡不必夭作忠者罹憂造偽者顯遂視彼蒼蒼方  
夢夢黤黤耳則所謂天者安在哉是以比干刳死屈原  
見放顏回短折孔孟隱約撫迹遭事使人憤惋悲歌長  
歎涕下不能自己故曰長歌之哀甚于痛哭今觀余公  
乃亦若此之倫矣周公之言曰視履考祥又其詩曰求

福不回夫余公自為邑令為臺諫暨今為按察副其履  
具載傳志其回與否至彰彰可考也往予在朝蓋親見  
余公行事謇諤貞諒是古賢之流也乃今弗究也又弗  
壽也祥與福固如是乎彼所謂天者安在歟如是雖欲  
使人不憤惋悲歌長歎涕下不可得矣故歌者導鬱鬱者  
也詩者敷志者也挽者宣悼者也今諸為余公作者誠  
不出于鬱悼則已使誠出于鬱悼則所以傷其志者必  
有甚于痛哭者矣或曰顏夭踰壽以變言耳彼信能與

世推移取富厚顯貴多金玉貨財安知其後之不喪也  
余君即弗究弗壽然天下皆知余公之賢也又安知其  
非子孫之利也詩曰既克有定靡人弗勝亦謂是耳李  
子曰誠若是則諸為余公哀者亦可以少紓焉矣

周處士挽詩序

人之情有七其感人莫如哀哀亦有七然莫如義而哀  
與夫耳目聞見而哀吾於彼苟交且親聞其災則痛閱  
其逝則感違其從則怨口吟之則歎鼻觸之則酸者固

也彼非吾交且親吾徒以見以聞以義者從而哀之毀  
於中而發於面作於聲氣布為歌詩斯非易能亦明矣  
龐公徐孺子一匹夫耳百世之下聞其履行見其山川  
墓廬欷歔瞻戀若失友昆非有大不得已必祠弔而後  
去是孰使之然邪宜興周景暉孝弟耕稼罔求聞于世  
鄉人化焉予不幸不獲與君識竊知其為學二子無疑  
也君年七十而卒卒之日其交若親既無所不用其哀  
矣已而見之者哀焉聞之者哀焉義之者哀焉君何以



得此邪哀不必同發而為歌詩則同此無他天下無二情也君嗣其以國子生謁選銓部自狀父行持哀歌詩一卷因刑部杭君來請予序予固未與君識受而不辭者義而哀之與人同也夫予既以前說應之矣復語之曰子歸展墓幸高其封樹百世之下安知不有祠弔而至者乎

空同集卷五十七

欽定四庫全書薈要卷一萬六千九百四十九

集部

空同集卷五十八

明 李夢陽 撰

傳

邵道人傳

邵道人者蜀人也至慶陽年七十餘矣道人不欲言凡所願指色授故莫究所自來然見之者率知其異人也道人館於鐘樓街周家築土被衲無晝夜露坐郡中諸

子弟少年爭來事道人道人凡所願指色授之諸子弟少年無不當道人意者道人喜看病病者家請往乃令病者張目又令其噓即可活道人則目諸弟子而諸弟子即置飯病者前道人出其袖中鐵尺橫飯上誦大悲呪已起尺摩病者曰瘥矣脫不活道人則趨而出病者家以死日請道人則出其指示日數如其指數然道人不取錢每歲自正月始活一人取其布尺裏衲裏完弗取也病者家脫有見飯飯道人以椀列諸案無問多少

道人食之若加飯更以椀列之不食也若見飯是草惡  
食道人即喜食之曰更為造美食道人則不食其見飯  
或雜葷物道人曰第擇去葷物終不欲更造也道人善  
飲水鄉野人聞之爭來請願觀道人飲水道人微笑頷  
然之弟子前置水道人目弟子令鄉野人自置水亦以  
椀列諸案無問多少道人飲之若冬月水冰則聞道人  
齒間澆澆聲頃之肩踴面紅汗簌簌下若雨也道人與  
予世父同時世父患脛瘍久不愈以問道人道人道曰此

崇也若往聘於某氏乎謂其女陋也將更聘之女慚而  
縊死此其崇也世父大驚伏地頓首曰奈何道人曰今  
遇我三日解矣三日瘍果瘥居十餘年忽謂諸弟子曰  
吾將歸歟諸弟子曰先生福慶之人慶之人無敢慢先  
生者何遽言歸邪道人不應一日道人令設几三層而  
坐其上諸弟子始悟其歸謂死也環守之夜有登几而  
伺其息者道人猶揮肱墜焉夜半霹靂隱隱起屋脊若  
戈士甲馬戰鬥之聲諸弟子震懾伏地天明起視則道

人死矣贊曰子不語怪若道人者何如人哉二氏惑世  
亂政而道人口悛悛不欲道辭急人之難斃而後已嗚  
呼是所謂逃于墨者非邪

### 太白山人傳

太白山人者吳越間放人也終吳越間莫知其所自來  
人問其姓名山人曰我孫姓一元名問其字曰我字太  
初問何以稱太白山人曰我秦人也嘗棲太白之巔於  
是稱太白山人云於是人始知山人為秦人及問其家

世山人不之答故人止知山人秦人也而不知秦何人  
也山人善詩有超逸才嘗出秦四游浮湘漢躡衡廬踰  
河涉泗謁闕里登岱嶽之峯憇日觀觀日出焉奇之駭  
叫狂走人頗異之然弗識之也於是山人則南走吳會  
人識山人又識山人詩於是爭禮敬山人山人固善說  
玄虛又膚瑩渥顏飄鬚望之如神仙中人於是愈禮敬  
山人而好異之士踵接于門矣山人往來越湖間多在  
支硎南屏山寺中鉅家則爭造寺餽山人美飲食鞋服

以是饒裕冠佩之士慕名來訪山人輒供具懽洽竟日  
酒酣暢歌意態超脫令人起塵外之思人士或事功人  
說及時事山人則又善說時事率鑿鑿副名實于是人  
士轉相譽稱為孫山人聞四方矣一日山人病且革倉  
皇屬其友曰死葬我佳山幸題我墓曰明詩人孫一元  
之墓已而山人甦起而憤曰幾負我志而吳越人以是  
覘知山人初無羽化術徒空談放浪形骸稍稍疑避而  
山人則顧益說世務恒切齒不平其詩亦多為忿激悲



壯之音于是用世之士顧益喜之樂與之交義投情合  
犯濤弄月扣舷和歌俯仰一笑每自許於世無雙而湖  
舉人施侃者雅喜山人而病其放因說之居山人然之  
于是買田苕溪之旁又說之婚則婚侃妻妹張氏喜山  
人者聞之率移書相慶曰太初為全人矣是時建業劉  
麟龍霓咸徙居湖與吳充陸崑暨山人結社游號苕溪  
五隱山人始講吾儒性命之學無何病卒竟死年三十  
矣李夢陽曰予不識孫山人何如人未之面也往劉子

過夷門蓋數稱山人風神藻雅云日與之游令人坐忘而山人亦時時寄詩來然予竟莫知其何人也

張光世傳

張光世者洵陽人也名鳳翔字光世號攸陵子生而異質殊才目羞日短視然暗處則反明燈月之下猶晝也故其書窓晝必遮障而後親也字左手橫書之興到筆飛瞬息滿紙李夢陽之舉鄉也蓋與光世同榜云先是西涯公遺提學石淙公書曰今年榜張潛冠乎石淙公

答之曰設無李張二生者潛不後矣及見試錄名第西  
涯公歎且服曰遂老知人遂老知人是時光世角尚壯  
業已夢寐屈宋追步班馬小視褒雄馳騁騷賦落筆千  
萬言奇字爛錯綺文輝奕觀者咸謂子安再生文考復  
出既至京師王公大人翰卿吟客訪造其門求其面識  
者殆日無虛也於是聲名出李上然光世不以自居未  
始不兄事李而讓其精也及舉進士李與同部見其面  
黃憂焉居無幾晴亦黃察其身又黃問曰光世不病疸

乎光世乃於是告休沐卧西山巖庵中李忖其非計遺  
之詩有曰石髓遇不識黃精春始花洞中日月秘強食  
勝丹砂光世于是乃移入城居無何卒年三十歲耳子  
安二十九文考二十四先是人以二子擬光世不識乎  
歿之日母七十餘歲子七歲一妻一妾相號於旅邸聞  
之無不心酸淚下者蓋傷張子才而不永又老者孤者  
孀者貧無歸也李於是作哀鳳之操鳳之來兮爾胡為  
兮牛有阜兮雞有棲鳳兮鳳兮今何歸傷哉命兮我心

悲是時李夢陽與曹縣王崇文亦部寮實經紀其喪事  
既以之歸葬洵陽夢陽復上書孝宗皇帝言鳳翔抱才  
未究居官清苦因病客死棺斂路費咸資友朋幸獲反  
葬禮遵首丘然老母孤兒幼妻不免凍餒溝壑伏冀聖  
慈追繹鳳翔前備庶員六年不無犬馬微勞體古之教  
帷牧蓋之義查近時李崙孔琦之例勅有司月給米一  
石養贍終其母妻之身奏下吏部准行至正德末有人  
自洵陽來言光世母謝世有司月米住支而河南巡撫

李公以前奏轉行陝西巡撫官言月米必終其妻於例  
乃合不知今何如行也嘉靖五年馬考功輯其遺文七  
卷屬胡蘓州板之行然散佚者不少矣於乎嗚其年復  
忌其文哉初光世歿李掇其手槁十餘帙未幾李罷官  
而人吏又無能識其槁中奇古字者會孫平泉過索之  
去曰吾必卒其事然竟無聞也論曰大化流行誰乎測  
哉相如病於金馬長吉死於玉樓居實摧於秋風胡畀  
之良胡奪之永是以豪夫志士惑焉仰天而問履霜而

悲凌雲託之大人造化比之小兒蓋憤簸弄之叵測而  
痛英雄之難遭也夫張子者固僻邑之產而寒素之倫  
也總角之年非有雞窓之授螢囊之聚者也一旦起而  
談玄虛振藻麗漸鴻之達空驥之羣斯直學之至之哉  
亦天之所以畀之也乃今若斯焉已大化果測乎吁傷  
哉然張盖亦嘗夢幢輶冉冉自天下廣樂導之若迎已  
者病之革也起端坐索紙筆掃詩一十八章言意漫渙  
弗次漸昏漸竭末詩有一章三句者一章二句一句者

投筆而氣絕矣今集中錄其全者一十四首

鮑允亨傳

鮑允亨者歙人商也與其弟乘米舟自湖陰之繁陽有  
三人者來附舟曰吾蓴人也舟人疑之不許允亨曰汝  
以渠赤身疑邪然渠蓴人也許之行至螃蜞磯舟回旋  
不得進於是允亨亦疑三人者亟舟舫遣之去而是夜  
盜果來執允亨兄弟縛之將並殺之曰汝識我乎允亨  
側窺之則附舟者也刃及血出矣允亨大呼曰吾母老



即殺我留吾弟其弟亦呼曰我殺無殺我兄賊猶豫不自決會大風起雨雷暴至江洶洶吼山鳴地震草木披亂賊恐散遁去一賊後謂允亨曰汝搗紙灰傳血處可痊也君子曰詩云無曰高高在上陟降厥士豈不信哉今觀鮑允亨事則急詐術而後仁義者不可省乎而或者則謂風雷之會為偶然斯亦甚可嗤也夫天何物也而欲豫謀哉誠謂義不足以入賊則江革趙孝之倫虛邪然予聞鮑氏先有值賊父子爭死賊兩釋之者若允

亨者亦其餘烈否耶

六烈女傳

儒生劉德舉來言六烈女事李子聞之泣然而涕出劉  
生曰夫子奚慟也李子曰予蓋傷為臣不終云於乎死  
生亦大矣往逆瑾之亂予實丁焉當是時人士大都以  
賊行問之曰救死爾又曰死瑾無謂於乎死生亦大矣  
彼粉黛笄禕之人乃顧若是烈邪自死瑾無謂之說興  
於是賊者公言於朝羣議於巷偶語於途以逮至則問

金多少為罪重輕於是天下吏曰考掠桎梏之咸金逋也下歛而上聚公簿而顯輸曰姑救死爾夫為臣宜若是否邪設靡賕瑾能盡死之邪於乎死生之際難矣彼粉黛笄褱之人乃顧若是烈邪予盖傷焉於是作六烈女傳陳氏者陳傑女也年十八聘楊瑄居無何瑄卒女痛哭將死之父母不許欲往哭瑄又不許女則竊翦髮屬媒氏往置其夫懷汴俗聘女生年月日朱綺金字與男家號定婚帖於是瑄母以定婚帖裹其髮懷瑄葬焉

而女乃遂卸容飾素笄縞衣居無幾父母謀改聘女縊而死天順五年六月十一日也後五十三年為正德甲戌瑄有侄曰永康者改葬瑄而求陳氏骨合焉二骨朽矣髮定婚帖獨鮮完劉生曰葬之三年而岐穀了瓜產之墓李子曰世人蓋多言青陵臺事予竊疑焉連理之木比翼之禽今以岐穀了瓜觀之不其信邪張氏者李傑妻也年十八歸傑踰年而夫病且死握其手訣曰我死汝必更然善侍後人矣妻泣矢之曰君死妾死不願

更也傑死張氏謂棺匠曰棺大之夫性喜寬大也其父  
母曰棺第狹之勿大匠從其父母狹其棺張氏哭毀其  
狹棺曰不大不棺也棺成自經而死高氏者夏永昌妻  
也嫁三月而永昌病死高氏欲從之然家人防之嚴則  
日主前焚香竊祝曰永昌俟我其母知之泣謂之曰汝  
今十九年耳奈何輕死高氏曰嗟母謂百年永邪然均  
死耳竟縊死劉氏者魏相妻也相之死也祖姑王覲婦  
有決志乃引婦登樓同寢婦哭之達旦不輟聲已給其

祖姑曰我飢渴甚祖姑信之下樓取水食婦以手中二幅接縊於梁上年二十一矣王氏者孫林妻也林病貧無以療王氏賣衣辦湯藥夜籲天祈身代之林死則匍匐哭不絕聲水漿不入口者二日乃潛詣後園棗樹自經死張氏者田孝子妻也孝子曰銳嘗割股療母病母死廬墓三年於是稱田孝子云孝子有甥宿舅舖而夜殺其隣舖客盜其財於是逮孝子獄無何孝子死出其屍塋為之崩張氏之死也或勸之矣則忿哭曰我與田

銳夫婦二十年矣彼既為孝子我獨不得為節婦邪竟  
死今按六女者皆祥符郭門西人也六十年間烈者六  
焉足謂之興矣聞風者激邪抑地之靈使然邪李子曰  
予於六女而重傷時俗之偷也孔子曰匹夫不可奪志  
乃人不欲死顧詫人曰我死弗獲死今以六女事觀之  
然邪否邪夫鉅鑊之嚇盈諸耳甘綺之誘戰于中人鬼  
之關須臾是決乃六女者方視死如歸求亡如飴遁間  
伺隙如探金攫玉惟恐後時而靡獲也斯其志可奪邪

不可奪邪夫粉黛笄禕之人至微也窮閭敎閨顯賴下  
賤之女非有閨閣之儲文史之訓父兄之指誨聞見之  
開卓也而一旦有如此者彼冠裳鳴珮之夫口先王而  
講詩書者乃往往狼貪而狗生患難之至不化蘅為蕭  
則豕突鼠竄矣於乎極矣予於六女安得不重傷時俗  
之偷也劉德舉曰斯舉也予倡首義於鄉人復白其事  
於官司矣業為六女立廟郭西贊曰貴非必爵輝豈惟  
華有碎而完有凶而嘉於烈陳女甘心未家槁骸竟雙



並帶則瓜岐穗離離載嘉者禾五女繼興奮義執情隕  
軀捨生展哉令名於惟六女生猶鴻毛死而遽巍山岳  
其高瞻廟者拜過里者式無貴無賤無識不識即跡揆  
心持獨驗同古今一感人心至公熊掌取譬瓦全是恥  
爾忠爾孝敢告君子

尚書黃公傳

尚書黃公者封丘人也名紱字用章其先洛人高祖克  
讓始徙封丘克讓生思豫思豫生秀秀生中中生黃公

初高皇帝兵起思豫掌太常事以罪編氓沅州已又軍平越衛於是平越沅州封丘洛皆有黃氏乃後秀商金陵死中收其貲商重慶娶于張生公重慶於是重慶亦有黃公生之夜夢老人抱嬰兒曰送塞尚書為汝子長依舅氏張宗琦宗琦為麻城學職從如麻城歸如平越補衛學生正統丁卯以春秋中雲南鄉試第五明年登進士第除行人陞南京刑部員外郎郎中出為四川參議參政進右使轉湖廣左使陞右副都御史巡撫延綏

進南京戶部尚書改左都御史尚書仍舊黃公廉峻直  
執遇事飈發正色山立即重忤時貴弗恤智巧所避公  
毅然肩之人率竊笑其杲然亦以是獲名郎中時人業  
以硬黃目之矣部堂嘗缺官公署堂印諸寮事之即猶  
堂官也亦才識超之之故譚千戶者大猾也善權顯貴  
人嘗奪民蘆塲顯貴人無敢為民直者公直之竟歸之  
民為參議督松茂諸倉兼備其兵釐革宿弊擒豪惡數  
百人舉劾將官各當邊賴以寧叅政如崇慶旋風擁輿

不得行公曰汝寃氣邪姑散予圖之至州齋沐禱夢翌  
日清其囚無驗乃禱諸城隍夜果夢若有神言州西寺  
云寺去州四十里邊路而巢山公旦起率州官吏兵往  
詣寺圍捕之有僧少而惡詰之無牒便醋罽塗其額曬  
洗之則有巾痕乃鞫訊之遂盡暴其奸慝云寺後有巨  
塘凡投宿人則殺之沉塘中衆分其財有妻女則分其  
妻女又攢典李節陽王親也侵盜官糧巨萬數王為之  
窟公按之悉如法公雖錢穀司然善摘發奸伏以是威

行境中嘗道川東青神令望風解印綬走為右使奏閉  
建昌銀礦許之大盜周主簿者哨衆抄掠檄公平之公  
謂盜起于煩苛宜少寬養而閹官以方貢橫歛公抗不  
從閹擠移近省陞左使時兩京工興徵銀二萬例派民  
公以庫積餘充又勢豪馬快船債萬坐逼索又荆王奏  
徙墳塚公悉不從省費鉅萬又計錮僧繼曉於是威惠  
大行繼曉之來也勢焰灼人公私謂諸公曰曉以妖術  
媚上遂奸眠食共今避而反鄉名掃墓而實逃生耳乃

令武昌府錮之後堂陽尊禮之居無幾曉果敗檻送京  
斬之西市公在蜀嘗忤閣臣萬安銜之三年六推咸抑  
公知之乃亦連疏乞罷凡三上已乃有巡撫延綏之命  
者劾叅將郭鏞都指揮鄭印李鐸王琮葭州史知州等  
又計捕豪奸張綱乃於是拔才能察幽隱問疾苦飭廢  
墜於是申號令修器械嚴警邏節候望邊政為新公見  
飲馬婦片布遮其下體乃悲以慚曰嗟乎士之貧至此  
極乃驅之戰守邪於是令豫支米月三會詔毀庵寺公

使汰尼解軍門給配鰥士人大懽悅無不願為公死者及公去尼有携子女拜送路傍者云公既官六曹益無所顧避威稜截然特旨改掌憲院天下方仰望風采公自以歷侍五朝中外凡五十年懃直嵯異忤人獲名伏禍難測又盛滿宜戒乃引年懇乞骸骨居無何疾作竟不起年七十有一所為奏議及政蹟并所著文詩悉棄不留晚嗜叅同契號精一道人蟾陽子有註本獨存國制文極於六曹尚書官之北斗天造不論夏蹇經綸

惻悞太宗北征全國是屬三楊公亮寅協熙績臺省坐  
臻太平君佚臣勞所謂代天之相英廟之遇文達略似  
馬周吁俞一德密畫顯斷萬幾精覈局體一變成化間  
忠良外植三原河州單縣封丘魏然輩出居則岳屹動  
則雷擊大事斧斷小細海畜帷幄佞幸請劍必殛使見  
之者畏聞之者懾斯其人死生富貴足動之哉然較之  
天順以前則殊矣時與位不同邪委任權力殊邪弘治  
中華容洪洞鈞陽靈寶陽曲盧氏金陵安福咸稱名卿



然志存納約行在精審苟濟其事小枉安焉局體又變  
矣雖形迹罔暴義遵矯直亦運數然歟自言路志伸毀  
譽進黜氣燄滿盛公卿歛遜正德以來遂靡靡難觀亦  
諸人甘寵飾譽稍有嘉美便立祠樹碑要歌徵頌鏤板  
鐫石惟恐不流今信後也此意既橫機巧自生工言論  
務彌縫斯又一變然黃公為左都則嚴甄御史量能委  
之火其差簿於庭曰事貴得人耳資勞久近豈立官者  
意哉當是時言官能毀之黜否邪斯為政在人邪抑時

不同邪公焚奏草自泯其嘉美視汲汲流今而信後者  
又何如邪江淝食鹽錢鈔民苦包攬掊勒呻吟公為尚  
書力條其折徵銀狀以聞至今行之便此其事比之汲  
汲流今信後者得與失不較然白哉公年二十六舉進  
士始室孫郎中鏞女也生子楫霖彬封宜人贈夫人繼  
室魯衛鎮撫宣姊生子杞桓封夫人蓋終其身無妾婢  
云彬工部司務桓光祿寺署正公卒之日皇帝驚悼遣  
祭勅有司營葬墓在長葛縣馬陵岡

江西按察司副使周君行實

正德七年閏五月二十六日江西按察司副使周君攻  
華林賊戰死之其子幹救之戰亦死時予在泰和聞之  
驚而疑已而實然則痛哭曰勇哉周君見危而授命已  
哀其子曰幹死于孝矣言是日君以賊食盡會兵三面  
夾攻君攻自北門三戰射輒中賊少却君與其子先登  
逼之會賊滾其墻石下如雨軍潰被執君頭中刀血流  
滿面左髀中鎗不能行猶大罵賊不絕口賊怒支解之

以徇其子幹前救君中鎗也然猶力戰竟墮岯死敗兵  
先昇其尸回營翌日諭賊求君尸賊裊裹尸還焉先是  
制兵者以馬腦華林賊劇滑諸山賊則日又竊發憂之  
會君到即檄君勦之君首擒廬山左湖盆塘賊百數軍  
為之振乃移軍奉新計擒飛王胡雪二馬腦寨平華林  
賊恐分立仙女寨以拒我君拔之賊又立寨雞公嶺君  
又拔之先後斬獲以千數於是進壁華林絕其出道壑  
之而守久之賊窘遣諜者言賊飢餓匍匐狀君信之遂移


檄會兵夾攻然它兵實觀望不大進而君獨與其子進  
逼之坐是敗而死於乎哀哉屢勝者驕邪抑命歟君弘  
治六年毛澄榜進士歷刑部員外郎謫兗州府通判正  
德改元復其官歷郎中大理府知府拜今官官一年而  
死夫逆豎之亂炎荒瘴海之濱死者屢矣君不之死也  
乃今死以此君為主事也檢獄政日莅視獄中人藥其  
病者員外郎則坐請貸言疑獄者罪貶官兩在郡無不  
得民也所至則又善剖疑獄此皆足不死乃竟死也君

系出元總管思後貌魁梧性侃侃不阿善星命之學談  
星命十中八九然不諳自命初華林之役有星命者實  
賊黨來談君星命已再拜賀曰美哉動罔不利君曰我  
刑殺太重無制其人曰夫刑殺者利于兵者也議遂決  
故曰天有大數世有大運人有大命故京房郭璞皆不  
免殺身由是觀之命可識矣君生天順四年閏十一月  
十一日午時年五十有三歲配宋氏封宜人四子金州  
學生娶黃氏紈娶馬氏幹死於孝者也娶劉氏春聘高

氏二女長適劉槩舉人次適李瞳州學生君父諱正大  
同府知府正父貴封滁州知州貴父復復父添祥添祥  
始居長沙後徙安陸州



空同集卷五十八



總校官庶吉士臣侍朝

校對官編修臣閔惇大

膳錄監生臣任益春